

以办理法兰西事交醇王一人。不独迎合朝廷意旨，直欲借此援系醇邸。小人胆大无耻，一至如此，可胜骇愕。

十三日。兰生至省。接到翰舟、槃希二信，亦接经生一信。即以致吴晴研信便附致槃希。往拜潘琴轩中丞、守蓉仙、福世侯、周稚威、闵丕斋、金耀庭、王霁亭、黄次圭诸大令、黄芍岩军门、酆吉堂、贾清臣、韩淦泉、瞿子玖、周荔樵、杨鹏海、王怀钦、黄子寿、黄子襄、吴定邦、韩勉吾、李作舟、杨绳之、陈镜亭、颜芸斋。随赴彭溧樵之召，处置彭怡生家事，仅得一彭丽生作陪，夜久始归。

十四日。接黄子冶、朱宇田、殷少乔、杨星堂各信。方料理节事，李麓渔乃以求忠书院课文求审定。人事纷集，颇以为苦。

十五日。以子寿赴上海之便，顺致徐雨之、张叔和、郑陶斋、聂仲芳此信未交帶各信。随接徐雨之、郑陶斋信，似《图书集成》已有定局，八月内即可开刻。所托之子寿者，正以点石斋与同文书局同时并举，不能不相（防）〔妨〕碍，欲得一准信，乃敢汇寄书价也。唐竹虚、徐仁羲、李华卿及麓安、寅伯枉过。晚邀张昆生、邓子柔、杨绳之、葛濬源、酆慕唐、李麓渔、杨毓吾为中秋之宴。适王亦陶枉过，为仆人所阻，旋得其一信。是夕踏月至陈程初、周步瀛。步瀛已开回安仁，程初外出，因至邓双坡处谈。张昆生见示溆浦艾式成古今体诗，极有奇气，闻其人通天文之学，亦知堪輿小术，辰州近时一学者也。

十六日。裕蓉坪、徐仁羲枉过。蓉坪屡约来见，适赴刘韞老，未晤。邓双坡、王亦陶、王实丞、傅青馥为公局致贺韞老两孙同中乡举之喜，予辞不至。邓双坡固以为言，乃于傍晚时一至小坐。

十七日。接汤斐斋、姜昆山、朱香荪各信。陈兰荪、龙树棠、言舫丞、戴柏生及东林过谈。日为此等无谓之酬应所苦，生世果